

25. feb. 2015

UPA2015/22

NAQQIISSUT

Anders Olsen-ip siunnersuutaa 22. Januar 2015-meersoq taarserpaa (Naqqiissutigineqartoq tassaavoq, qallunaatoortani Siunnersuutip aningaasatigut allaffissor-nikkullu pisortanut kinguneqaatissani peerneqarami: *“taamaattoq eqqarsaatigineqarsinnaavoq pilersaarusiornissamut aningasartuutit ilaat kontomi pingaarneq 40.94.13 “Timersornermut tapiissutit”, 7,8 millioninik aningaasartalerneqarsimasut ukiuni missingersiorfiusuni.”* soorluttaaqa kalaallisut allassimanerani tungavilersuummi naqqinneqartoq taasissutissartaani naapertuutinngitsumik ukiuliisimaneq.)

Inatsisartut suleriaasianni § 33 naapertorlugu Inatsisartut aalajangiiffigisassaattut siunnersuut imaattoq saqqummiuppara:

Nunatta inuiattut timersornikkut unammersuarterfissaanik qulisamik ”National stadion”-imik pilersitsinissaq siunertaralugu Naalakkersuisut pilersaarummik kingusinnerpaamik UKA2016-mi saqqummiunneqartussamik suliaqaqqullugit peqquneqarnissaanik Inatsisartut aalajangiiffigisassaattut siunnersuut. Pilersitsinissamut pilersaarummi misissorneqassapput unammersuarterfissap ingerlanneqarnerani sanaartornissamilu aningaasatigut pissutsit atuuttussat.

(Inatsisartunut ilaasortaqa Anders Olsen, Siumut)

Tungavilersuut:

Isertuusassaangitsumik nunatsinni meerartatta, inuusuttatta aammalumi inersimasortatta timersornikkut piginnaasaat tupinnaanartumik annertupput sulilu annertusiartorlutik.

Tamannalu ilutigalugu nunatsinni pissusissamisoorpoq timersornikkut periarfissat suli ullumikkornit pitsaanerusementik periarfissiuunissaat politikkikkut annertunerusementik aqutissiuuneqartariaqalerpoq.

Timersornermut periarfissaasut ullumikkornit pitsaanerusementik periarfissarsiuunnarutsigit ilaatigut isumaqarpunga Nunatta timersortarfissuassaanik qulisamik "National Stadion"-imik pilersitsisoqarnissaa siunertaralugu suliniutit aallartisarneqartariaqalersut. Piffissanngorpormi nunatta timersornikkut nunarsuarmioqatigiit unammuaarnerinut angisuunut peqataasalernissaa siunertaralugu suliniutit aallartisassallugit.

Takorloorsiuk nunarput atletikimi 100 miiterimut oqilaniunnermi peqataatitaqartalersoq, takorloor-siuk nunarput 400 miiterimut oqilaniunnermi peqataatitaqartalersoq, takorloorsiuk nunarput Olym-piademi unammuaarutaasartut assinginik amerliartuinnartunut peqataatitaqartalersoq, ilami aamma takorloorsiuk nunarput isikkamik arsaattartunit tusaamasanik England-imiit, Frankrig-imiit, Spania-miit, Brasiliamiit Argentinamiillu tikeraarneqarluni unammiaartorfigineqartalersoq. Takorluukkat immaqqa ukiorpaaluit matuma siorna piviusorsiuungitsutut isigineqarsinnaasut maanna takorluuiun-naarluta timitaliinissatsinnut suligasuartariaqalerpugut.

Nunatta issittumi inissisimanera eqqarsaatigalugu "National Stadion"-ip qulisaallunilu kiassagaasin-naanera pingaaruteqartuusussaasut isumaliutigisariaqarpoq. Taamatuttaaq tusindtilikkaanut isigin-naartarfeqartussaannissaa aamma isumaliutigineqartariaqarluni.

Tamakku tamarmik qulaajarneqarnissaat siunertaralugu pilersitsinnginnermi pilersaarummik suliaqartoqarnissaa pingaarluinnarpoq, taamaasilluni "National Stadion"-issap qanoq ittuusussaannera, qanoq angitigisussaannera, qanoq akeqartussaannera kiisalu qanoq aningaasalersorneqarsinnaannera missingersorsinnaalissagatsigik. Tassalu taanarpiaavoq aappaagu 2016-mi ukiakkut Inatsisartut ataatsimiinissaanni Naalakkersuisut pilersaarummik saqqummiussinissaannik siunnersuut. Pilersaarutip suliarineqarnerani soorunami susasaqartut peqatigeqqinnaarlugit ingerlanneqassaaq, asser-suutigalugu ilaatigut Timersoqatigiit Kattuffiat matumani aamma.

Siunnersuuteqartutummi takorluungilluinnarpara nunatta karsiata kisimiilluni timersortarfissuassaaq aningaasalersussagaa, tassami pilersaarusionerup ilaatigut

takuteratarsinnaavaa nunatta avataanniit aningaasaliislinnaasussanik immaqa nassaarneq. Taamatuttaaq "National Stadion"-issap kommunimi sorlermi inissisimanissaa aamma apeqqutaalluni kommuni inissisimaffiususaaq aningaasaliissu-teqaqataasinnaassasoq isumaliutigineqarsinnaavoq.

Pinerlunniarnerup atornerluisuunerullu akiorniarneqarneranni annertuumik timersorneq aqputaa-lluni inuiaqatigiit iluanni suliniutit takusarpagut ajunngilluinnartumik takutitsiviusartut tamatsinnullu tulluussimaartitsisuusartut. Taannaavorlu ullumikkorniit suli annertusaavigalugulu aqputissiuuttariaqagarput kingulissagut eqqarsaatigalugit.

Timersorneq nuanniinarani aamma imminut tatiginermik, upperinermik misigititsisuuvoq, misigisassaqaartitsisuuvoq inuunermi nuannersorpassuarnik puigugassarinnngisanik assitalersuisoq. Taannaavorlu inuiaqatigiit ingerlatitaaneranni suli inerisarnerullugu ataatsimoorullugulu suliarisariaqagarput. Timersorneq aqputaalluni Kalaallit Nunaat nunarsuarmioqatigiinnut imminut tulluusimaarutigisoq pilersittariaqalerparput.

Siunnersuutip aningaasatigut allaffissornikkullu pisortanut kinguneqaatissai

Siunnersuut allaffissornikkut Namminersorlutik Oqartussanut aningaasartuutiniq malitseqassaaq, allaffissornikkummi nukinik atuinissamut illikartitsisoqassaaq misissueqqarnissamik soqutigisaqaaqatigiinnillu ataqaqatigiissaarinissamut il.il. Siunnersuuttip akuerineqarneratigut piffissami UKA2016-ip tungaanut aningaasartuutit ilimagineqassapput ukiup ilivittup ukiullu ilivittup aappaa avillugu missaani sivissusilimmik AC-mik atuisoqarnissaa, tamanna 500.000 – 750.000 kr. Missaani annertutigissaaq. Aningaasanit pineqartunit isumaqarpunga Namminersorlutik Oqartussani allaffissorneq soorluttaaq tunngavilersuutini soqutigisaqaaqatigiit pineqartut aningaasalerneqarsin-nasut. Aningaasat allaffissornerup iluani aningaasaliissutaareersunit tiguqartariaqarput.

Siunnersuutip namminersorlutik inuussutissarsiortunut allaffissornikkut aningaasatigullu kinguneqaatissai

Siunnersuut namminersorlutik inuussutissarsiortunut aningaasatigut kinguneqarnaviangilaq

Siunnersuutip innuttaasunut allaffissornikkut aningaasatigullu kinguneqaatissai

Siunnersuut innuttaasunut sunniuteqarnaviangilaq.